

Resposta husi Francisco Guterres Lu Olo

La'o Hamutuk

Institutu Timor-Leste ba Monitor no Analiza Dezenvolvimentu

Rua D. Alberto Ricardo da Silva, Bebora, Dili

Tel: +670 332 1040 Mobile: +670 7723 4330

Email: laohamutuk@gmail.com Website: www.laohamutuk.org



Kestionáriu ba Kandidatura Prezidente Repúblika periodu 2022 - 2027

Pergunta sira:

1. Saida mak ita boot nia vizaun estratéjiku ba dezenvolvimentu ekonómiku iha Timor-Leste iha tinan lima oin mai bainhira eleitu nudár Prezidente Repúblika? No Intervensaun saida de'it mak ita-boot sei halo atu realiza vizaun estratéjiku ida ne'e iha estadu?

- Dezenvolvimentu ekonómika ida ne'ebe nia centru mak ema nu'udár autor no nu'udár mós beneficiariu
- Defende dezenvolvimentu ekonomia ida ne'ebé mak sustentavel, ekilibriu ba povu hotu jerasaun agora no jerasaun futuru nian, tuir Konstituisaun RDTL (Artigu 61 no Artigu 139):
 - garante aproveitamentu rekursu natural hotu tenke iha balansu/ekilibriu ho meu ambiente/ekolójia no sees husi destruisaun ba ekosistema sira,
 - promove asaun sira hodi proteje no conserva meu ambiente no **salvuarda dezenvolvimentu ekonomia ne'ebé sustentável**
- Tanba ne'e, sei fo enfaze ba dezenvolvimentu iha setor produtivu liuliu **agrikultura, turismu, no dezenvolvimentu setor privadu** hodi bele aumente empregu, hasae rendimentu familia, no hasae mos rendimentu Estadu, atu labele kontinua depende ba osan husi rekursu naun renovavel sira.
- Intervensaun sira inklui:
 - Promulga lei sira inklui Lei Orsamentu Estadu no lei sira seluk ne'ebe fo espasu ba povu atu hola parte ativu iha prosesu dezenvolvimentu TL, no hetan benefisiu.
 - Hanesan PR, iha mandatu ida primeiru uza ona majistratura de influencia PR nian, hodi tulun governu halao programa atividade no atividade sira ne'ebe hatur ema nudar centru ba dezenvolvimentu: Uma Kbiit Laek, ne'ebé fo fatin dignu ba ema sira ne'ebé presiza no fo serbisu ba membru comunidade sira no la'os kompañia boboot; Cesta Bazika ne'ebé estimula produsaun husi toos-nain no natar-nain iha rai-laran,
 - Tinan 5 oinmai, hakarak kontinua promove enkoraja no promove politika sira ne'ebe hanesan, no sei enkoraja governu atu aloka orsamentu ne'ebé

natón ba setor sira importante ba dezvoltimentu ekonomia TL ne'ebe sustentavel no inklusivu liuliu agrikultura, turismu, industria, no dezvoltimentu setor privadu no edukasaun ho saúde.

2. Oinsá ita boot nia estratéjia atu asegura direitu umanu, partisipasaun no representasaun fetu no ema marginalizada seluk iha ita nia demokrasia, iha ita nia rai rasik?

- Durante mandatu primeiru nudar PR,
 - Halao-ona dialogu ho grupu ema ho defisiensia no loke Palacio Prezidente ba sira hodi komemora loron internasional ba ema ho defisiensia
 - Promulga-ona dekretu lei hasae osan bolsa da mae, idozus, apoiu ba ema ne'ebé moris ho defisiensia no cesta bázika.
 - Loke mós Palaciu Prezidente ba fetu, labarik, no grupu vulneravel sira hodi komemora loron internasional no nasional sira
 - halao ona dialogu ho lider partidu politiku, lider historiku no figura nasionais sira, lider igreja Katolika no konfesaun relijiozu sira seluk, no sociedade sivil hodi garante unidade Estadu no estabilidade politika, no kompozisaun no funsiunamentu governu
 - Dignifika partisipasaun sidadaun nian iha promosaun direitus umanus liuhusi atribuisaun Premeu Sergio Viera de Melo
 - No sei kontinua polítika no programa sira ne'ebé mak respeita ema hotu nia direitu no garante ema hotu nia partisipasaun iha prosesu demokrátika hotu iha Timor-Leste

Se hau sai PR ba period 2022-2027, sei:

- Nafatin kaer metin unidade Estadu no estabilidade politika, no liuliu orgaun soberania sira-nian, no kompozisaun no funasiunamentu orgaun sira seluk nian, atu ema hotu bele goza moris iha dame no harmonia, no bele partisipa iha ita nia demokrasia,
- Kontinua promove inkluzsaun politika no social, atu haree sidadaun hotu ho esperitu igualidade no solidaridade ba ema hotu inklui fetu, juventude, no ema vulneravel no marginalizadu sira seluk, hodi labele husik hela ema ruma ba kotuk
- Kontinua halao dialogu ho sidadaun sira inklui comunidade/grupu marginalizadu atu sira bele hatoo sira nia preukupasaun no opiniaun.

3. Daudauk ne'e, maioria Timor-Leste nia povu mane, fetu no labarik sira seidauk hetan nutrisaun, edukasaun no saúde ho qualidade

- Sujestaun saida mak Prezidente sei fó ba governu no Primeiru Ministru no Ministru balun kuandu presiza?
 - Primeiru, sujere atu aumenta orsamentu ba setor edukasaun, saude, no nutrisaun hodi ema hotu bele hetan nutrisaun, saude, no edukasaun ho qualidade.

Tuirmai ne'e, mak sujestaun balun ba governu, kuandu presiza:

- **Nutrisaun:** sujere ba governu atu implementa programa integradu ba mellora nutrisaun: aumenta produsaun aihan lokal ne'ebe iha nutrisaun diak, promote inovasaun ba (kulinaria/gastronomia), no halo kampana nasional ne'ebe enfaze maneira fasil ba ema atu han/konsumu hahan saudavel lorloron no iha ne'ebe deit.
 - **Saude:** sujere ba governu atu periodikamente aumenta infrastrutura no ekipamentus saude, no investi iha dezvoltamentu rekursu umanu (liuliu dotor especialista sira) hodi halo prevensaun no tratamentu, hodi reduz mortalidade labarik, inan, no ema hotu ne'ebe sofre moras liuliu dengue, kankru, TBC, moras-fuan, moras sira seluk ne'ebe agora dadauk labele halo tratamentu iha Timor.
 - **Edukasaun :** sujere atu anualmente aumenta infrastrutura no rekursu umanu (profesores sira ne'ebe kualidade iha ensinu hotu), hodi aumenta asesu no mellora kualidade hodi forma jersaun futuru ne'ebe iha abilidade serbisu. Rekruta joven sira ne'ebe graduadu ona, maibe dezempregu hela, fo formasaun ba sira hodi bele hanoin. Kontinua fornese bolsa da mae, hodi asegura labarik hotu liuliu sira ne'ebe husi familia kbiit laek, bele asesu edukasaun.
- Iha ka lae kompetensia seluk, alende veta no promulga lei ne'ebé aprova iha Parlamentu, liu-liu hodi haree ba asuntu hirak ne'e?
 - Asaun saida mak efetivu liu Prezidente bele foti hodi hetan solusaun ba problema sira ami temi iha leten ne'e?

Tuir kompetensia ne'ebé mak Konstituisaun fo ba Prezidente da República, semana-semana Primeiru Ministru hasoru malu ho Prezidente da República, no ida ne'e kompetensia no biban ne'ebé mak diak mós ba Prezidente da República hala'o majistratura de influencia hodi halo diálogu ho Governu atu buka solusaun ba kestoins hirak ne'ebé mak levanta iha leten.

4. Tinan hira ikus hafoin 2012 Timor-Leste nia reseita husi mina no gás tun-sa'e ba kondisaun ne'ebé ita labele kontrola. Maske Timor-Leste nia kampu mina Bayu Undan sei remata iha tinan ida ka rua, no kampu Greater Sunrise iha duvida komersiál, setór produtivu sira hanesan agrikultura, indústria transformadóra sira no turizmu seidak iha kreximentu.

- Oinsá Timor-Leste bele muda husi dependénsia esportasaun ba mina, gas, no minerais ba dalan sustentável liu?
 - Polítika ka sujestaun saida mak Ita-Boot sei kontribui atu hasa'e ekonomia Timor-Leste no sustenta finansas estadu bainhira mina-rai sei maran?
- Timor-Leste nia fundu petrolio agora dadauk sei bele sustenta to'o maizumenus tinan 10 to'o 15 oin mai. Nu'udár Prezidente da República, Kandidatu sei halo serbisu ho governu atu garante katak Fundu ne'ebé sei disponivel ne'e, tenke aloka iha seitor sira ne'ebé mak bele halo retornu no nune'e lahalakon deit fundu ne'ebé mai husi fontes ne'ebé la'os renovavel. Presiza halo jestaun diak (halo

poupança) liu-husi alokasaun ba deit ba setor sira ne'ebe importante liu ba desenvolvimento umanu no diversifikasaun ekonomia: liuliu saude, edukasaun, bee no sanementu, agrikultura, turismu, industria, no desenvolvimento setor privadu hodi diversifika fontes rendimentu estadu.

- Investe no reforma agrikultura hodi atrai populasaun ho idade produtivu sira/juventude sira ba servisu iha area ne'e, atu bele inova no hasae produsaun produktu lokal ne'ebe orienta ba konsumu rai laran no mos rai liur, segura seguransa aihan (garante auto-sufisientia familiar), hamenus importansaun (importa deit produktu ne'ebe labele produz iha rai laran), no hasae exportaun liuliu produktu sira ne'ebe iha valor ekonomiku as no iha demanda husi merkadu rejional/global (hanesan kafe, vanilla, kami, maek, sandalo, ai gaharu,)
- Sei enkoraza governu atu identifika no explora potencia ekonomia sira ne'ebe mak eziste atu halo desenvolvimento ida ne'ebe mak ekilibradu no sustentavel iha Timor-Leste nia ekonomia.
- Mellora kondisaun/ambiente ne'ebe favoravel ba desenvolvimento setor privadu liuliu hodi atrai investor sira hodi mai loke industria sira, partikularmente iha setor sira ne'ebe mak sei tulun diversifika Timor-Leste nia ekonomia

5. Dékada rua Timor oan restaura nian independéncia, felismente ita laiha tan funu, tratamentu kruél no desaperesimentu forsadu. Esforsu saida mak ita-boot bele kontribui hodi ajuda hakotu impunidade ba krime grave durante okupasaun Indonézia nian? No iha Relatóriu Chega! rekomenda atu comunidade internasionál liu-liu Nasaun sira no kompañia sira inklui atór sira presiza fó reparasaun ba estragu ne'ebe iha durante funu. Ita-boot sei halo esforsu ruma atu asegura diretu ida ne'e ba sobrevivénte sira?

- o Asegura relasaun bilateral ne'ebe diak entre Timor-Leste ho Indonesia ho esperitu rekonsialiasaun entre estadu rua
- o Nu'udár Prezidente da Repúblika, Kandidatu sei halo sujestaun ba governu atu ratifika konvensaun no tratadu internasionál ne'ebe mak sei tulun Nasaun rua hadiak no haforte liu tan relasaun bilateral.
- o Sei apoiu politika reparasaun haktuir rekomendsaun Chega! ne'ebe agora dadauk iha prosesu elaborasaun husi Governu, liu husi Centro Nacional Chega!
- o Nu'udár Prezidente da Repúblika, Kandidatu sei enkoraja Governu no entidade relevante sira atu fahe lisaun pasadu Timor-leste nian ba Mundo, liu husi internasionalizaun relatoriu Chega!

6. Liga ba Artigu 87. (Kompeténsia kona-ba relasaun internasionál) daudauk ne'e funu entre Rúsia no Ukránia, iha semana rua liu ba Rúsia halo invazaun kontra Ukránia. Husi atake ida ne'e, rezulta ona ema barak mate, estraga infrastrutura barak iha territóriu Ukránia nian no ema liu tokon ida ho balun (1,500,000) mak hasai sai ona husi Ukránia. **Nudár Prezidente Repúblika, saida mak ita boot sei halo hodi kontribui pás iha mundu, no asegura relasaun dí'ak entre nasaun hotu?**

- Solidariedade ba povo Ukraina ne'ebe sai vitima ba funu ida ne'e.
- Prezidente da Repúblika fo apoiu ba desizaun governu nian, liu husi Konsellu Ministrus, hodi halo kontribuisaun ba apoiu humanitarian liu husi Nasoins Unidas ba povu Ukraina.
- Nudar Prezidente Republika, sei sujere/demanda ba ONU atu buka solusaun dame ba problema entre Rusia no NATO, nune'e bele iha deskalasaun no garante Ukraina nia neutralidade para bele hetan dame.
- Demilitarizasaun hodi prevene konfliktu/funu, no promove liu dialogu no kooperasaun dame hanesan iha setor social, kultura, no ekonomia, no haforsa relasaun diak entre povu. Opta solusaun dame, duke funu/konfliktu tanba sei la resolve problema, maibe fo deit susar no terus ba povu.
- Fahe lisaun pasadu Timor-leste nian liu husi rekomendasaun Chega!
- Hanesan Prezidente da Repúblika, no nu`udár Komandante Supremu Forsas Armadas nian, Kandidatu sei serbisu hamutuk ho Governu no Forsas Armadas nia lideransa atu kontinua dezenvolve liu tan Forsas Armadas Timor-Leste nian, F-FDTL atu sai forsa ne'ebé iha kapasidade ba halo serbisu sosial no humanitaria iha iha rai liur. Hanesan Prezidente da Repúblika, Kandidatu sei haka'as an atu serbisu hamutuk ho país amigu sira hanesan Portugal, Australia, Estados Unidos Amerika, Indonesia no Malaysia atu tulun dezenvolve F-FDTL iha kapasidade ba partisipa iha misaun da páz sira Nasoins Unidas nian iha ne'ebé deit iha mundo ne'e.

7. Tinan hirak ikus ne'e, **Governu koko introdús lei krime sibernetika no kriminaliza defamasaun**, ida ne'e iha poténsia ba limite liberdade imprensa no espresaun, ita-boot sei iha esforsu ruma atu asegura liberdade ema nian ba espresa no imprensa, inklui iha media sosiál? Oinsá ita boot bele enkoraja Timor-oan sira hotu atu rona ba malu?

Lei **krime sibernetika no kriminaliza defamasaun** ne'e tenke proteje dignidade umana husi diskursu falsu (hoax), odio (hate speech), no duun-matak (calúnia/slander), no asegura liberdade imprensa no espresaun. Se lae, ema bele abuza liberdade imprensa no espresaun atu atinji ninia objetivu liu-husi fahe lia falsu, odiu, no duun matan inklui liu-husi media social. Lei ida ne'e iha hela prosesu diskusaun no elaborasaun. Se sai Prezidente Republika karik, hau sei halo estudu ba lei refere, bainhira governu submete, hodi tetu didiak ninia aspeitu negativu no positive, rona ema hotu-hotu nia hanoin antes foti desizaun atu promulga ka veta.

Naran Kandidatura: Francisco Guterres Lu Olo.

Data: 16/3/2022

Asinatura: 

Representante Candidato:
Fernando Dias Guterres
77999570.